

wantok

Niuspepa bilong ol Papua Niugini stret

NESENEL

Namba 247

Bilong wik i stat long Sarere, 2 Desemba 1978

Prais 10t.


NO KEN PRET....

Poto i kam long dipatmen bilong turis.

MIPELA PAIT GIAMAN TASOL



Published by Wantok Publications, P.O. Box 1982, Boroko. Phone: 25.2214. - Printed by Mirui Press, Newak.
Registered at the General Post Office, Port Moresby, for transmission by post as a Qualified Publication.



Poto antap i soim sampela bilong ol 224 studen i bin winim kain kain kos long Goroka Tisa Koles, na i bin kisim setifiket bilong ol long Trinde, 15 Novemba.

I gat 36 i bin winim kos long egrikalsa; 8 i winim teknikal kos; 8 i tinim kos bilong ol seketeri; 122 i winim diploma bilong tis em ol i bin skul tu yia long kisim; na 50 i bin winim konvesen kos.

Mista Renagi Lohia, hetman bilong Yunivesiti bilong PNG long Moresby is bin tilim ol dispela diploma long ol.

Na Mista Oscar Tammur, Minista bilong Edukesen, i tilimaut ol prais long ol spesel studen. Odette Oa na Noah Pune i win olsem nambawan studen tru bilong koles. Mis Veronika Pekima i kisim prais long "Home Economics"; Titus Usukuni long "Commerce"; Sista Zita Pushai long "Conversion Course"; Lindsay Teobasi long "Design and Technology", na em i kisim tu long "Expressive Arts"; Nuegu Billy long "English"; Akapina Anskar long "Home Economics"; Betty Hoahania long "Mathematics"; Noah Pune long "Professional Studies"; Oswald Bako long "Science"; na Anita Tovat long "Social Science".

Poto i kam long Sista Norbertine Rijk, OLSH



National weekly in
 Melanesian Pidgin.

Editorial Offices:
 P.O. Box 1982
 Boroko

Phone: 25.2214
 25. 2552
 Telex: NE 22213

Branch Offices:
 Wewak
 Phone: 86.2479

Wabag
 P.O. Box 111
 Phone: 57.1018

Advertising:
 In P.N.G.
 Penny Donald
 Phone: 25.2214

In Australia:
 Peter Halse Associates
 King York House
 32 York Street
 Sydney (2000)
 Phone: 29.7527
 Telex: 21. 409

Subscription Rate:
 Annual: K8.00.

Poto daunbilo o soim lain katolik tisa bilong daosis b. long Kavieng, Nu Ailan, i sanap wantaim Bisop Stempe bihain long ol i bin pinisim wanpela ritrit o sarap lon, MSC Senta long Kopkop, klostu long Kavieng.

Long dispela sarap, Pater Joseph Muller, MSC, i bi stiaim pre na tingting bilong ol inap long tupela de

Bihain long ritrit, ol dispela tisa i bin kibung na i bi kamapim wanpela Asosiesen bilong ol Katolik Tisa b. long Nu Ailan. Mista Blaise Tommi i bin kamap pres. den bilong en; Mista Ben Pulpulis i seketeri bilong en na Misis Gabriella Miti i tresara.



EM I PUNDAUN O OL I SUBIM EM???

Bipo long sampela wik Mista Julius Chan na Pipels Progres Pati i bin lusim gavman. Nau ol i sanap arasait wantaim Oposisen. Na Yunaitet Pati i go insait poromanim Pangu long ranim gavman.

Sapos yumi lukluk i go bek nau, na glasim gut Pipels Progres Pati na ol lida bilong en, i luk olsem ol i no bin wetim bai ol samting i kamap olsem em i stap tude.

I tru, insait long kem bilong Pangu, planti bikpela man i no laikim PPP tumas. Ol i ting em i pasim rot bilong ol aidia bilong ol. Na PPP i bin pait strong moa egens long lo bilong ol lida na olsem em i pundaun. Olsem na planti dispela bikpela Pangu man i driman long de PPP i ken lusim ol. Tasol ol i ting em i no samting i ken kamap hariap. Em samting bilong bihain tru.

Olsem na Mista Somare i kalap nogut tru taim Mista Chan i kirap na wantu i tekewe pati bilong em long gavman. Long wanem tupela i gutpren. Tupela i bin wok gut wantaim olsem poroman. Planti taim bipo Mista Chan i surikim ol aidia bilong em, na i larim aidia bilong Somare i win. Tasol nau dispela taim, Chan i sanap strong na i soim: "Mi no surik moa. Mi sanap nau i stap." Olsem na em i goaut.

Mista Chan yet i bin tok olsem: Ol bikpela lida bilong PPP i putim hevi long em. Sampela i sem long Pangu i bin daunim ol na givim sampela smolpela wok minista ol i no laikim. Ol i les pinis. Olsem na ol i strong long Chan na PPP i mas aut.

Olsem na mipela i askim: Mista Chan i bin goaut long tingting bilong em yet, o sampela man i bin subim em?

Ol PPP lida bai mekim wanem samting nau? Bipo ol i no pren liklik wantaim lain bilong Mista Okuk. Okuk na Jephcott i olsem birua bipo; nau wantu tupela i stap long wanpela kem. Olaboi. . . Na na Okuk. . . husat bai kamap namba wan? Yes, Okuk i bin surik liklik long taim bilong vot egens long gavman na i bin mosen long larim Mista Chan i kamap praim minista. Tasol dispela em i tingting bilong nau tasol bilong helpim em i winim mosen.

Husat i ken tingim Mista Okuk olsem man i belgut long kamap namba tu man long gavman tasol? Na sapos Mista Okuk i kamap namba wan, olsem wanem long Mista Chan? Na Dokta Guise i no ausait olgeta! Ating em i wet i stap.

Na olsem wanem long tupela bikpela PPP man: Mista Lemeki na Mista Levi? Tupela i bin tokaut strong tru egens long lo bilong lida na tupela i bin redim rot bilong pundaun bilong Mista Chan. Nau bai tupela i mekim wanem? Nau bai PPP i mekim wanem? Ating planti samting i bin popaia liklik long ol.

Somare stretim wari

Long apinun tru bilong Fonde, 23 Novemba, Praim Minista Michael Somare i bin givim wanpela toktok long redio i go long olgeta manmeri bilong Papua Niugini bilong stretim sampela tingting bilong ol. Sore, em i mekim long tok Inglis. Olsem na hia mipela i laik givim sampela poin bilong en long tok Pisin. Em i tok olsem:

Pipels Progres Pati i bin lusim gavman bilong yumi na Yunaitet Pati bin kam insait sanap wantaim Pangu long ranim kantri. Nogut sampela trik tok o tok kusai o tok win i flai nabaut na yupela i ting, nau yumi no gat gavman. Em i giaman. Em i no tru. Yumi i gat gavman. Mi praim minista na het bilong gavman yet, na olgeta samting i ran gut.

Nau Yunaitet Pati i stap insait long gavman na mipela i hepi, long wanem, nau em i namba wan taim long stori bilong kantri, bikpela lain minista tru bilong gavman i kam long Hailans tasol. Olsem yupela i ken lukim nau: tripela wok minista tru i stap long han bilong ol Hailans, em Fainens (Holloway), Transpot (Wingti) na Helt (Doa). Olsem na yupela i ken save mipela i

wok tru long mekim go het gut wok bilong kantri. Na maski long olkain paitim tok na kros tok na vot long ol wik i go pinis.

Mipela long gavman i save pinis mipela i gat planti samting long wokim yet. Tasol yupela i ken lukim, long ai bilong ol ausait kantri na ol bisnismen na saveman bilong ol Papua Niugini i sanap strong na i ran gut. Olsem na ol i laik kam hia na kirapim wok na bisnis.

Gavman i wok yet long givim moa pawa long ol pipel. Em i wanpela as-tingting tru bilong mipela.

Na mipela i strong moa long dispela aidia: ol lida tru i mas tingting long yupela ol pipel, na i no tingting long poket bilong ol. Dispela yet i as bilong trabel namel long ol sampela

lida bilong PNG yet - olsem yupela i bin lukim na harim pinis.

Tasol maski, em i no samting bilong pret. Nogat. Em i samting bilong fri kantri, em i samting bilong kain gavman ol i kolim demokrasi. Pawa i stap long ol pipel; pawa i stap long ol man i makim ol pipel. Na ol dispela man long palamen i bin vot na i orait long mi mas holim yet wok lida long dispela kantri. Ol i no votim narapela man. Nogat. Ol i bin votim mi tasol - olsem bipo.

Ol dispela i soim, yumi Papua Niugini yet yumi inap long stretim ol wari bilong yumi. Maski long tingting bilong arapela kantri. Yumi bin soim ol planti taim pinis; yumi soim ol gen. Orait. Pinis tok nau. Yumi go het skruim gutpela wok i go.

Wok na saplai straik

Ol wokman bilong Dipatmen bilong Wok na Saplai bilong gavman long planti provins i bin stap longwe long wok bilong ol inap 4-pela de. Ol i straik. Ol dispela man i bilong union ol i kolim Pablik Sevis Asosiesen na ol hetman bilong union i bin tokim ol memba long straik bikos ol i no laikim pasin bilong gavman long pinisim 580 wokman long wok bilong ol.

Dispela i min long dispela 4-pela de i no gat draiva bilong ol ka bilong gavman. Na ol woksap bilong gavman i no wok.

Ol dispela Wok na Saplai wokman i straik, ol i aninit long Pablik Sevis Komisin bilong gavman. Na hetman bilong en, Mista Rabbie Namaliu, i tok: dispela straik i brukim lo na ol wokman i goaut bai no kisim pe long ol dispela de.

Tokman bilong union bilong ol dispela wokman, em ol i kolim Pablik Sevis Asosiesen, em i Mista Jek Karukuru. Em i strong long gavman i mas mekim olsem:

(a) Gavman i no ken pinisim ol dispela man long wok inap long neks Febreri.

(b) Gavman i mas painim

wok long ol long narapela dipatmen o ples.

(c) Bihain ol i pinis, ol wokman i mas kisim wan mun ekstra pe long olgeta yia ol i bin wok; nau gavman i givim wan wik ekstra pe long ol yia ol i bin wok pinis.

(e) Gavman i mas givim dispela ekstra mani long ol man em i pinisim long wok, long de dispela man i pinis; na tu i mas baim rot bilong em i go bek long ples.

Mista Namaliu i tok olsem: Dipatmen bilong em i bin orait long klostu ol dispela samting bipo. Em i tok tu, dipatmen bilong

em i bin givim tok save long ol dispela wokman 6-pela mun bipo, olsem lo i tok. Na sampela arapela i bin kisim tok save 3 mun bipo na 1 mun bipo. . . . sapos ol i wokman nating.

Em i tok tu: dipatmen bilong em i bin traim painim nupela wok bilong ol dispela man. Tasol em i no bin painim spes long ol arapela dipatmen bilong gavman, na long ol bisnis na faktori.

Long Maun Hagen na Wabag ol wokman i no bin bihainim dispela straik. Ol i pret long lusim pe bilong ol.

PAS I KAM LONG OL PIPEL

SAMPELA IRIAN JAYA AIDIA

Dia Edita - Mi laik mekim toktok olsem wanpela sitisen bilong PNG. Dispela samting i bin kamap long boda bilong PNG na Irian Jaya em i wanpela bikpela samting tru. Yunaitet Nenses em inap stretim dispela bikpela trabel olsem tromoi bom klostu long PNG boda. Yunaitet Nenses em i gat lain soldia bilong en inap was long boda.

Somare-Chan dispela toktok politik bilong yutupela wantaim Indonesia em long ausait tasol. Long insait tru bilong Indonesia em yutupela i no gat save tru long en. Long 1975 taim Presiden Sukarno i stap em i bin pait wantaim Holan Gavman i rausim ol na kisim Wes Irian. Sukarno em i bin trik na tok em bai rausim Holan Gavman na em bai holim Wes Irian bihain givim Independens. Man, dispela em i mama bilong giaman i stap long em.

Nau yumi lukim ol wantok bilong yumi Wes Irian nau ol i trai hat long kisim independens. Mi laik askim tupela lida na ol politik man long PNG, dispela bom ol ami bilong Indonesia i tromoi, em i wanem samting?

Mi wanpela man nating long PNG rabis tok bilong mi olsem, em ol i testim tasol. Samting tru i stap insait yet i no kamaut. Ating long yia 1982 i go inap 1985 bai i gat sampela samting bai i mas kamap.

Las tok bilong mi i go long gavman na ol bikman bilong politik. Yupela i mas sindaun gut na toktok bringim bek dispela wok bilong PNGVR na ami kedet long ol haiskul. Ating dispela em i gutpela samting tru long lainim ol yangpela na ol bikman long sampela we bilong pait. Sapos birua i laik pait yumi save pinis long sampela we.

Ol Indonesia i ken woka-baut i kam insait na kisim PNG na narapela samting inteligens sevis i no gat tru wanpela we bilong stopim ol man i save kam insait

long PNG. Dispela ol pipel i mekim dispela wok i mas opim ai na yau maski long slip.

Narapela samting inteligens sevis long PNG nogat tru wanpela gutpela ekwipmen samting bilong wok. Dispela long wanem PNG gavman i slip tumas i no wekap.

Sapos wanem rida i laik bekim o rabisim tok go het tasol, yumi ken lukim na skelim. Bob Akwi, Manus

BOIPREN O PENPREN

Dia Edita - Yes nau mi laik autim liklik wari bilong mi. Na wari bilong mi i go olsem. Planti taim mi save kisim Wantok Niuspepa na mi save painim olsem. Sampela meri i save askim long penpren na long niuspepa ol i tok ol i laikim man o meri long rait long ol olsem penpren bilong ol.

Na mi yet mi bin rait long wanpela meri na mi laik rait long em olsem penpren bilong mi. Tasol em i no bin bekim pas bilong mi, inap long tupela mun. Olsem na mi gat wari na mi rait long yupela ol susa na bai yupela i ritim.

Mi ting olsem, ating yupela i laikim ol man tasol i rait long yupela? Ating em i luk olsem yupela i no laikim penpren. Nogat. Yupela i laikim boipren ya. Laka, ol susa?

Na ol susa, em tasol liklik wari bilong mi i pinis. Na sapos yu wanem meri, yu gat wari o belpen long dispela hap tok, plis tru rait tasol i kam long Wantok Niuspepa, bai mi lukim na ritim.

So em tasol, ol susa. Tenkyu tru.

Elisabeth Agnes,
Wewak.

BEKIM SKUL PE

Dia Edita - Mi laik autim liklik wari mi laikim olsem. Bilong wanem yupela stopim ol standet 6 liva na fom wan na tu. Yupela i tok olsem fom tu na standet 6 i no gat wok na mipela i tingting planti na

taim mipela i go long skul ol papamama i hatwok tru long helpim ol long skul.

Na tu mipela i hatwok long i go long skul na mipela i tromoi bikpela skul fi bilong mipela. Na mipela i go long skul mipela yet baim pensil, na buk na sampela samting mipela i kisim fri. Tasol bikpela mani mipela i spendim long skul. Olsem wanem mipela spendim dispela bikpela mani i go long skul beng nating. Mi laik bai yu mas skelim liklik wok bilong ol skul liva olsem standet 6 na fom 2.

Mipela i gat bikpela wari tru long wok o painim wok. Yupela mekim olsem bai Papua Niugini i gat moa save na kantri bilong yumi bai i gat bikpela nem. Na wokim ol kain kain samting long PNG. Na PNG i gat planti liklik ples o ailan nabaut i stap sapos yupela i sekim ol wok olsem. Bai mipela i ken painim wok gut tru. Bilong wanem mipela laikim kantri bilong yumi bai i go antap na wanem sampela kantri.

Em tasol.

Polimba Lakivemau,
Kavieng.

Salim ol pas
i kam long:

WANTOK
BOX 1982
BOROKO

PLANTI EMTI BOTOL

Dia Edita - Plis mi laikim bai yupela givim liklik hap spes long mi long putim liklik askim bilong mi. Askim bilong mi i go olsem, bilong wanem na ol faktori bilong wokim kol dring i daunim pe bilong emti botol i go daun?

Nau long dispela taim mipela i save baim sotpela botol long 24 toea. Long mipela long Rabaul, taim mipela i save salim emti botol long wan katen, ol faktori bilong wokim kol dring i save baim mipela long 20 toea tasol.

Olsem na nau long dispela taim emti botol i pulap long olgeta hap bilong Rabaul taun. Bipo pe bilong botol i nogut olsem na mipela i no bungim gut bilong salim. Plis mi laikim bai wanpela man bilong faktori yet i mas givim mi ansa. Tenkyu.

Bonny N. Kuakam,
Rabaul.

KROSIM OL HAISKUL MERI

Dia Edita - Mi laik autim liklik wari bilong mi. Mi wanpela sumatin bilong Dregahafen Haiskul, mi lukim sampela haiskul meri i penim pinga nil na maus bilong ol. Taim bilong wok, ol boi save putim olpela klos bilong ol, na ol meri bai bilas gut tru na ol i ting, nogut mi wok na skin bilong mi i doti. Nogut klos bilong mi i doti.

Na hatpela wok olsem brukim paiawut na katim gras, em ol boi tasol i save wok. Na em i no stret long mi. Dispela kain wok inap long ol skul meri i wok wantaim mipela ol boi.

Ol susa yu ting em hatpela wok na yu ting ol boi tasol wok. Na yu raun long ples na lukim wantok bilong yu, yangpela meri long ples i ken karim 2 o 3-pela mekpas paiawut. Taim bilong wok yu brumim klasrum tasol. Na yu ting wok i pinis na i go slip nating na yu ting, nogut yu wok na pinga bilong yu i doti. Nogut yu wok na klos bilong yu i doti.

O susa yu sindaun olsem na husat bai wok? Dispela yu penim maus bilong yu na pinga bilong yu, em kastam bilong yu yet o bilong narapela kantri? Taim mi wok mi putim olpela siot na trausis bilong mi. Na yu pasim longpela laplap i kam sanap klostu long rot, lukim mi, na i lap long mi.

Mi sori tru long yu dispela klos bilong yu. Yu yet wok na kisim o krai long papamama na ol i givim yu?

Em tasol liklik wari bilong mi. Husat man i laik sapotim dispela em i orait tasol. Na husat skulmeri i

laik egensim dispela, yu ken rait i go long Wantok Niuspepa na bai mi ken lukim. Tenkyu.

Tarako D.,
Finschhafen/Lae.

SOLDIA BEKIM TOK

Dia Edita - Brata Nicademus, em i bin bel hevi tru long dispela taim, yumi bin makin bikpela de bilong yumi, em Independens de 16 Septemba 1978. Wantok hia em i bin askim olsem, em i lukim olgeta ba na taven na hotel long Wewak i klos. Long wanem em i Independens de. Tasol ol man long fos olsem polis na ami ol i wok long drin long klap o DIFCO bilong ol. Em i olsem wanem?

Brata, yu bin kirap nogut nau tasol long dispela yia 1978 long dispela kain pasin olsem taim bilong holide na olgeta pablik ba na hotel wantaim ol taven i save klos na klap bilong ol fos o Difco tasol i save op ol memba bilong fos tasol i save dring long dispela taim? Mi ting i mas nau tasol yu kam long taun, laka? Long wanem long taim bipo ol Australia i bosim yumi yet na i kam inap long dispela taim yumi bin kisim Independens na tu long las yia, olgeta kain holide olsem, Kiap bilong ol soldia bilong yumi, bipo ol i save kolim Asco o Australian Sevisis Cantin Oganaisesen em i bin op tasol olsem na i no gat komplek i bin kamap, olsem na mi tok ating nau tasol yu bin kamap long hia long hap we ol kem bilong ol fos i stap long en. Na olsem yu bin lukim na yu komplek long en. Brata, i no bilong nau, bilong bipo bipo yet.

As bilong en i olsem, dispela Difco, em i no Pablik ba o taven, em i klap bilong wanpela lain grup, em i olsem Motel o samplea kain hap we ol memba i gat lo o rul insait long klap bilong ol.

F. Berry,
Tau-Vavau,
Wewak.

Putim hevi long viles divelopmen

Mista Paul Torato, memba bilong Enga, i bin putim sampela hevi long Viles Divelopmen Fan. Em i tok olsem, pablik akaun komiti i mas glasim gut ol ofis buk bilong dispela divelopmen fan, stat long de namba 6 bilong Novemba i kam inap nau.

Em i tok, ol i mas glasim gut tru, husat i bin aplai long kisim mani long dispela divelopmen fan, na hamas dispela man i bin kisim tok orait. Em i tok ol i mas ripot tu, hamas memba bilong palamen i bin askim, na hamas viles grup bilong ol i bin askim, o kisim mani long dispela fan.



Mista Torato i tok olsem: planti memba bilong palamen i pilim, long dispela taim mipela i wet long mosen egens long gavman, sampela memba i bin aplai long kisim helpim o mani long dispela divelopmen fan.

Mi save long wanpela memba, bipo em i egens long gavman olgeta, na em i bin sindaun toktok wantaim sampela minista bilong gavman, na neks de em i vot wantaim gavman.

Olsem sampela mipela i wari na i filim, ol samting i no stret. Sapos gavman i no laik givim tok save long komiti, bai mi bringim dispela saunting long palamen.



Pita Lus bekim tok

Mista Pita Lus, Minista bilong bisnis, i bekim tok olsem: Mi sori tru long harim Mista Paul Torato i bin mekim sampela toktok nating egens long Viles Divelopmen Fan.

Wok bilong dispela divelopmen fan em i bilong helpim ol pipel bilong yumi long kirapim na mekim go het ol liklik bisnis bilong ol. Mipela i bin yusim olsem tasol; na em i bin helpim planti pipel.

Em i no stret ol man bilong politik i kamap putim nating hevi long kain wok olsem i save mekim gut long ol pipel.

Mipela i no haitim wanpela samting. Olgeta man i gat rait long lukim ol buk na pepa long ofis bilong dispela divelopmen fan, ol i ken kam na lukim. Welkam long ol.

Gavman i no komyunis

Sampela memba bilong Oposisen i bin sutim tok long gavman i save bihainim tingting na aidia bilong ol komyunis na sosialis, na olsem ol bisnisan bilong ol ausait kantri i no laik moa long kam insait wokim faktori na nupela bisnis.

Mista Karl Kitchens, Minista bilong ol Main na Enerji, i bekim tok olsem: "Mi laik stretim tok na autim hia sampela tingting

bilong ol ausait kantri na bisnisan i go long PNG. Long dipatmen bilong mi i gat sampela bikpela bisnis tru long painim wel na wokim gol na wokim kopa. Olsem na mi laik mekim tripela tok save long ol oposisen memba. Em hia:

1) Nau ol bikpela ausait kampani i laikim tru long kam insait long wok long painim wel na kopa na gol samting. Insait long las 18 mun i go pinsi, ol dispela kampani i bin lusim K40,000,000 (40 milion kina) long mekim dispela kain wok. Olsem, i no tru-ol ausait bisnisan i no laik kam nau.



2) Ol bikpela kantri na niuspepa i bin tok amamas long pasin bilong larim ol bisnisan i kam insait long PNG na wok . . . na olsem wanem dispela kantri i lukaut long ol i mas mekim gutpela wok na i no ken bagarapim kantri. Na tu gavman i larim ol i kisim gutpela winmani long wok bilong ol.

3) Moa na moa bisnisan i askim long kam wok long PNG. Em i soim, ol i orait long pasin bilong gavman na go het bilong em: na ol i pilim em i gutpela ples tru long wok."

ATING YU SAVE

Long 8-pela mun bilong dispela yia 1978 ol man bilong wokim kopra i bin wokim 93,008 tan kopra. Em i klostu 8,000 tan moa olsem long dispela sem taim long yia 1977. Na sapos transpot i mobeta, bai PNG inap wokim moa yet.

Kaputin soim ol wari

Nupela Minista Bilong Nesenek Divelopmen, Mista John Kaputin, i bin autim olgeta tingting bilong gavman bilong mekim go het kantri long yia 1979.

Gavman i givim mani long 318 kain kain wok long wan wan provins. Wol Beng na narapela bikpela beng ol i kolim IMF i tok amamas long pasin bilong go het bilong kantri na program bilong dispela yia i laik kamap.

Mani bilong PNG i strong na i isi tru long PNG i ken kisim dinau long ol arapela kantri. Em i min ol i bilip long mipela na long wok na go het bilong kantri.

Bikpela wok kantri i bin mekim inap nau em dispela: gavman long wan wan provins i go het, pasin bilong painim takismani i go het, na moa na moa lokal pipel i insait long wok bilong kantri.

Inap nau wok na go het insait long sampela provins i ran moa moa yet. Em i bikos sampela provins olsem Not Solomons na Is Nu Briten i gat planti kain we long winim mani. Na tupela yet i bin statim dispela pasin bilong kamap provins.

Pasin bilong go het bilong ol meri PNG i go slo yet. Wan hap bilong olgeta pipel bilong PNG i meri tasol. . . . tasol ol i kamap bihain long skul na helt na bisnis na wok.

Wok bilong stretim wari bilong ol yut o yangpela pipel. . . . em i hevi i krun- gutim gavman na ol papamama na ol tisa na ol yangpela pipel yet.

Long PNG tude yumi no laik lukim wanpela lain o grup i maniman tru, na narapela i rabisman tru. Tupela i mas skel mobeta.

Mipela i laik hariapiu pasin bilong skulim-olgeta manmeri. Bihain long 17 yia samting mipela i ting

bai olgeta man meri pikinini long PNG inap rit na rait na kaun. Na em i bikpela samting, long wanem ol dispela kain pipel i ken go het hariap moa na helpim ol yet. Na mipela i laik putim hevi na strong long ol provins we ol meri i no save kam long skul.

Mipela i laikim tu bai helt i kamap long olgeta hap. Na transport tu bai i no gat sampela manmeri i longwe long helt senta na haus sik. Na tu transpot i helpim ol long bringim ol samting i go long maket.

Yumi mas lukaut long wanpela samting i go rong. I gat planti samting yumi save groim na wokim long dispela kantri i kostim moa olsem wankain samting yumi ken baim long ol ausait kantri. Em i no pasin bilong mekim go het samting bilong kantri.

Yes, mipela i welkamim mani na bisnis bilong ausait i kam wok hia. Tasol em i mas helpim tru kantri bilong mipela. . . . na oltaim mipela i mas bos




long em; em i no ken bosim mipela.

Wanpela bikpela samting yumi mas mekim nau tasol: groim inap kaikai bilong kantri bilong yumi. Yumi ken groim inap mit bulmakau, ol samting bilong gaden, na inap suga bilong PNG.


Wanpela samting moa: yumi mas yusim gut ol wara samting bilong bringim lektrik pawa i kam long ol liklik ples. Dispela yumi ken mekim long ol riva bilong mipela yet.

Aveling Barford Pacific Pty. Ltd.
Representing the world's
leading automotive manufacturers.

Ume St. Gordon, Port Moresby. Phone 257166, 257908
 Morobe Ave. Lae. Phone 424188, Mt. Hagen. Phone 521015
 Stones Automotive Services, Kieta. Phone 956093
 Malaguna Motors, Rabaul. Phone 921751




RYCO-FLEX
 Hydraulic hose, assemblies,
 couplings, adaptors.



NACHI

Bearings—automotive industrial
 machinery. Roller, ball, taper bearings.
 Extra small radial ball bearings.
 Single row deep-groove ball bearings.
 Double-row self-aligning ball bearings.
 Tapered roller-bearings.
 Cylindrical roller-bearings.



Strong Tru.



HUSKY
DYNA

Niupela trak bilong Toyota i save wok hat tru.
Yu laik karim kago o pasindia — long biktaun
o rot nogut long bus — dispela trak em inap.

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAUL 92 1988

KIETA 95 6083

WEWAK 86 2255

GSP ET 013P

Madang Woksap

Long 29 Me inap 4 Jun ol hetman bilong Viles Developmen i bin mekim namba tu bikpela kibung bilong ol opisa bilong ol long Siar Ailan klostu long Madang. Dispela taim ol i singautim 10-pela opisa i save wok long ol nambis provins olsem Is na Wes Sepik, Madang, na Morobe. Na tupela bilong Hailans tu i bin kam.



Poto antap i soim lain manmeri i bin go long woksap yumi stori long en long dispela pes.

I gat 27 spesel pipel i bin kam long dispela kibung na 9-pela bilong ol i meri. Yu ken lukim ol long potu i stap arere long dispela stori. Het Opisa bilong Nesenel Kaunsil Bilong ol Meri, em Jessie Piliwas, i stap. Na sampela meri bilong ol klap bilong ol meri tu i bin kamap.

velopmen, i bin soim ol deliget ol dispela samting tu: pasin bilong wokim wel long kokonas. Em i soim ol deliget dispela wel kokonas i save lait tru long lam. Pasin bilong mekim loli long kokonas. Pasin bilong wokim bret insait long ol sospen, ol i raunim nabaut long hatpela ston tasol; pasin bilong mekim drai pis long san tasol; pasin bilong wokim kap long mambu.

Nau ol deliget i go bek long ples na viles Developmen Opis i laik save, bihain long sampela mun ol i bin mekim wanem samting long ples bilong ol.

Long kibung ol deliget i bin kisim helpim long Dipatmen Bilong Helt i wari long gutpela kaikai, long Opis Bilong Tok Save, long han bilong Edukesen Dipatmen i skulim ol bikpela manmeri, long Welfe Dipatmen, long Praimeri Industri, na long Famili Plening.

§

Ol i bin skul long film na tok na wok long ol dispela samting: pasin bilong salim olkam samting long maket, pasin bilong redi long wok. Yu laik askim, pasin bilong yusim gut mani: pasin bilong askim ol grup long givim mani long wanpela wok: pasin bilong raitim daun long buk olgeta wok bisnis olsem ol kuskus i save mekim.

Mista Andrew Kauleni, Dairekta Bilong Viles Di-

Ol dispela stori bilong kukim gutpela kaikai i kam long wanpela gutpela buk ol i kolim Buk Bilong Kukim Gutpela Kaikai. Yu ken kisim nating. Yu rait tasol i go long:

The Nutrition Section,
Department of Health,
P.O. Box 2084,
Konedobu.



pinat sup

Ol samting yu mas i gat:
sampela pinat
liklik grinpela anien
sol
4-pela kaukau
hap pamken
kumu
gris bilong kukim kaikai

Rot bilong wokim:

1. Rausim skin bilong pinat.
2. Kukim pinat long gris i hat pinis inap i kamap braun.
3. Katim anien i go liklik liklik na praim wantaim pinat. Pinis, orait, taim pinat i tan klostu.
4. Rausim skin bilong kaukau na pamkin. Katim i go liklik na kukim long wara wantaim sol.
5. Wasim kumu na katim i go liklik liklik.
6. Taim kaukau i klostu kuk pinis, putim kumu na pinat na anien i go wantaim.
7. Larim i stap long paia inap olgeta i tan pinis.

Yu ken kukim olgeta long gris bilong kokonas.

SINGER

**PREN
BILONG YU
INAP OLTAIM**

Singer Company

VILLAGE EQUIPMENT SUPPLIERS

Bikstua bilong olkain masin na tul bilong wok didiman na wok kamda



- MASIN BILONG KATIM KAUKAU
I KAMAP OLSEM LIKLIK BISKET K150.00
- CINVA MASIN BILONG WOKIM BRIK K315.00
- MASIN BILONG RAUSIM 8.50
- MASIN BILONG KATIM BILONG KOPI (tripela kain 3.50
- MASIN BILONG KATIM BILONG SMOLPELA SMOLPELA 5.70
- MASIN BILONG KATIM MIT 5.70

Ol dispela prais i bilong stua bilong mipela long Lae. Sapos yu laikim wanpela lista i gat nem bilong olgeta kain masin na tul samting mipela i gat long stua, orait, yu rait o ring i go long Menesa:

Micah Kusak,
Box 2172, Lae.
Telipon: 42.4902.

Moa Relisen Long Skul

Mista Oscar Tammur, Minsita bilong Edukesen, i bir tok save olsem: nau wan wan provins i ken givim moa taim long skulim ol sumatin long tok bilong God na tok bilong Baibel insait long taim bilong skul.

Nau ol i ken makin wan aua na 40 minit long relisen o tok bilong God, long olgeta koymuniti skul long wan wan wik. Bipo ol i gat wan aua tasol. Na inap nau o misin skul i kisim tok orait long skulim ol sumatin moa yet long relisen bihain tasol long taim bilong ol arapek skul i pinis.

Long ol provinsal haikul nau ol i ken skulim o studen long relisen inap long tu aua na 40 minit insait long taim bilong skul. Em i olsem tu aua moa long bipo.

Em i samting bilong ol papamama long tok sapos ol laikim ol pikinini bilong ol i kisim skul long relisen, na long wanem kain relisen.

Ol dispela lo i no karamapim ol Nesenel haikul na o haikul i yusim pisin skul bilong Australia.


19. Sapos yu lukdaun long wara, bai yu lukim piksa bilong pes bilong yu. Sapos yu luktuk i go insait long bel bilong yu - bai yu lukim yu yet.
20. Olkain laik bilong man i olsem ples bilong ol daiman - oltaim i gat spes bilong moa moa i ken kamap.

BOROKO MOTORS

SAPOS YU GAT WOK-TINGIM FORD



Tractors
Equipment



Yu ken lukim nupela FORD TRAKTA long BOROKO MOTORS long olgeta hap bilong Papua Niugini. Na tu yu ken baim long Arawa Motors, na Sepik Engineers, na long Kimbe Bay Shipping, na Highlands Heneni Goroka, na Higatura Motors Popondetta.



OL MEKENIK BILONG
MIPELA INAP FIKSIM
FORD
LONG OLGETA HAP

Mipela i gat planti spea pat na mekenik.

STORI BILONG OMBUDSMAN KOMISIN

Ombudsman em i wanem samting?

Ombudsman em i wanpela man i save harim ol wari na hevi ol pipel i gat egens long gavman na pasin bilong en. Ombudsman i mas painimaut: ol dispela wari i gat as bilong ol o noga. Dispela aidia bilong makim wanpela man bilong mekim dispela wok lukaut, em i stat long kantri Swiden long Yurop long yia 1809, na em i bin go long planti arapela kantri tru. Taim PNG i kisin independens long 1975, gavman i opim wanpela opis bilong ombudsman, na dispela ol i kolim Ombudsman Komisin.

Bilong wanem yumi gat wanpela Ombudsman Komisin?

Mipela i gat dispela Komisin bikos ol manmeri i bin raitim Konstitusen ol i laik bai ol pipel bilong PNG i mas gat wanpela man i ken helpim ol, sapos ol i gat wari o kros long gavman na ol opisa bilong em. Olsem na gavman i wokim wanpela Ombudsman Komisin long Desemba 1975. Em i gat wanpela het ombudsman na tupela helpman bilong em. Ombudsman Komisin em i no wanpela dipatmen bilong gavman. Nogat. Em i sanap bilong em yet; na i independens. Em i no aninit long wanpela gavman dipatmen o opisa.

Ombudsman Komisin i gat tupela bikpela wok. Namba wan wok em hia:

Ombudsman Komisin i gat tupela bikpela wok. Namba wan wok em hia: ombudsman i mas putim yau na harim ol wari bilong pipel na glasim gut-taim ol i sutim tok long gavman o wanpela dipatmen bilong em. Ombudsman i mas go toktok wantaim dispela dipatmen long gavman na traim stretim tok na wari wantaim em. Sampela taim ombudsman i ken skulim ol gavman opisa long pasin bilong stretim wari. Namba tu wok em i bilong lukaut bai ol lida i mas bihainim gut lo bilong ol lida. Dispela lo i stiaim wok bilong ol bik-

pela memba bilong palamen na opisa long gavman, bai ol i no ken yusim pawa bilong ol long putim planti mani long poket bilong ol yet.

Husat i memba bilong Ombudsman Komisin?

Het ombudsman nau em i Mista Ignatius Kilage. Tupela poroman bilong em i Mista Andrew Maino na Mista Sunny Cheviau. Gavana jeneral na wanpela spesel komiti i save makim ol ombudsman. Ol memba bilong dispela komiti em hia: Praim minista, het jastis, lida bilong oposisen, siaman bilong pablik sevis komisin, na siaman bilong komiti bilong palamen i lukautim dispela-kain wok. Man i kamap ombudsman, em i mas stretpela man tru, man i save sanap strong long tingting bilong em, man i gat gutpela nem na gutpela namba long ai bilong ol pipel.

Ombudsman i mekim wok bilong em olsem wanem?

Ombudsman wantaim ol poroman na opisa bilong em, i save raun long olgeta hap bilong kantri na harim na ritim ol wari bilong ol pipel. Sapos man o meri i kam autim wari bilong em long ombudsman, namba wan samting, ombudsman i save skulim em long go stret long dipatmen o opis bilong gavman na traim stretim tok. Sapos em i mekim olsem na opis i no

stretim tok, o dispela man i belnogut yet, orait nau em i ken kam bek long ombudsman. Nau ombudsman komisin i traim painimaut as tru bilong wari. Em i ken ritim olkain ripot bilong gavman na toktok wantaim ol manmeri i wok long gavman. Komisin bai painimaut sapos gavman i bin stretim wari bilong manmeri o noga. Em i ken skulim ol tu long pasin bilong stretim wari.

Ombudsman Komisin i gat pawa long bosim sampela dipatmen bilong gavman bai ol i mas bihainim tingting bilong em?

Nogat. Ombudsman Komisin i no gat pawa antap long gavman. Em i ken givim gutpela skul na tok tasol, na kain kain ripot na tok save. Tasol bikos ol lida i sapatim ombudsman komisin, klostu oltaim ol i save bihainim tok na ting bilong ombudsman komisin.

Komisin inap autim olgeta kain kain tok save em i kisin pinis?

Nogat. Em i autim tasol wanem tok save i mas go insait long ripot. Planti wari na tok save, em i save haitim i stap. Olgeta opisa na wokman bilong opis bilong Komisin i mas tok tru antap, ol bai no ken autim ol tok ol i bin harim o ritim long pas.

Komisin inap long harim wari i go egens long sampela bisnis kampani?

Nogat. Em i no gat pawa long ol bisnis kampani. Tasol em i save mekim olsem: taim pipel i kam wantaim wari bilong ol, ombudsman i salim ol i go bringim dispela wari i go long dipatmen bilong gavman i save bosim ol kampani. Ombudsman komisin i no gat pawa long putim hevi long ol kot, na i no ken helpim ol manmeri i no laikim tok bilong kot. Em i no ken egensim sampela lo ol minista i wokim, na tu i no ken egensim ol lo bilong ol lokal gavman kaunsil.

Inap hamas taim Komisin i wet bipo em i traim stretim wari?

Komisin i no ken promis bipotaim em i mas wet hamas taim bipo em i ken stretim wanpela wari. Ating i gat planti arapela wari tu i bin kamap, na sampela i bikpela wari tru. Ol bikpela wari i mas go pas. Yumi mas stretim ol pas-taim. Na tu sampela taim komisin i mas wetim gutpela bung wok wantaim bilong ol gavman dipatmen. Nau ol gavman dipatmen i save wok gut wantaim ombudsman komisin.

Yumi inap painim Ombudsman Komisin we?

Sapos yu stap long Moresby, yu inap go long opis

bilong Ombudsman. Em i stap long Hubert Murray Haiwe long Badili. Em i klostu long PNG stua bilong salim ol pepa na buk samting. Yu ken ringim ol long dispela namba: 25.2122, o yu ken rait i go long:

Ombudsman Commission
P.O. Box 2123
Konedobu

Komisin i gat tupela han opis nau - long Hagen na Rabaul. Hia em i adres bilong ol:

Ombudsman Commission
Kum Strit
P.O. Box 745,
Mt. Hagen.
Ring: 52.1986

Ombudsman Commission
Kona: Mango Strit/
Wirraway Strit
P.O. Box 455,
Rabaul
Ring: 92.2013

MAS GAT RISPEK LONG VILES KOT

Minista bilong Jastis na Lo long Is Nu Briten Provinces, Mista Anton Bos, i tok save long olgeta man i mas rispektim ol viles kot. Maski ol i man bilong wanem kala skin.

Em i tok olsem, nesenel gavman yet i bin kamapim ol viles kot na i bin orait long lo bilong ol. Na olsem olgeta pipel i mas rispektim ol lo bilong en, maski ol i lo bilong waitman o lo bilong tumbuna.

Minista i bin tok olsem, bihain long wanpela Saina na wanpela plantesin mensesa bilong Australia i bin brukim na bagarapim wanpela pepa i kam long wanpela viles kot long hap bilong Kokopo; na i singautim tupela i go long kot. Tupela i no bin go tu.

Tupela i bin kot long stretim sampela trabel na wari i bin kamap name'l long ol wokman bilong tupela.

Poto long lephan i soim 3-pela ombudsman inap nau wantaim olgeta manmeri i wok long opis bilong ol long Moresby. Tripela i sindaun i Mista Frank Hedges, Mista Ignatius Kilage, na Mista Andrew Maino.





Poto antap i soim sampela man bilong PNG i kisim kos bilong ol menesa inap long 3 mun. Kirap long lephan yu ken lukim: Jacob Yai (Ela Motors Rabaul) Joseph Morehari (Burns Philp Port Moresby), Igcriom Kualiong (PNG Development Bank, Lae), na Andrew Huruavi (PNG Harbours Board menesa, Samarai).



Poto antap i soim lain brotkas opisa i tren le Kondun (Mendi), Justin Kili (Lemanmanu, NBC Moresby; Paul Kafafi (Yangoru, Is Sep NBC Wewak; David Laufa Haro (Iaokes, Falby; Penuel Damaku (Milne Bay) NBC Moresb;

KISIM SAVE LC

Lain daunbilo i soim lain pipel i skul long nupela we bilong ripot long ol samting i stap long ol gavman stua. Kirap long lephan em i : Sebastian Maka (Tapini, Goilala), Misis Joy Gordon (Iokea, Galp Provins), Warren Thurston (tisa bilong ol), Boko Vani (Hanuabada), Alan Eleli (Fane, Goilala), Peter Koipa (Kerema, Galp). Ol i stap skul long Melbourne.

Olgeta poto i kam long Australian Information Ser

Sampela moa brotkas opisa bilong NBC i sta yu ken lukim: John Teona (Kuka, N. Solome Ailan, Nu Ailan) Redio Nu Ailan, Kavieng; K lans, Goroka; Benson Patiliu (Gingalom, Nt Westen Prcvins) Redio Westen Provins, Daru.





tralia. Kirap long lephan yu painim: Ronald (ns) NBC Moresby; Joe Kariko (Tubuseria) C Wewak; Joseph Jano (Angoram, Is Sepik) Moresby; Douglas Gabb (Karkar) NBC Mores-


Dispela lain tu i kisim kos long wok menesa. Ol i sindaun wantaim Mista Fred Kaad, bipo em i D.C. bilong Madang. Kirap long lephan: Nicholas Peta (Buka) Lands Department, Moresby; Doketa Ilagi (Kelekapana, Sentral Provins) Ela Motors, Rabaul; Locley Iga (Hula, Sentral Provins) Bunting Stevedores, Lae; na John Valukia (Kuraip, Is Nu Briten), Burns Philp, Rabaul.

IG AUSTRALIA

er Kelly, Bob Maccoll na Norman Planti i kisim.

ilo. Ol i tren long Sydney. Kirap long lephan lio N. Solomons, Kieta; Tony Sapan (Lambon Sae (Asarufa, Isten Hailans) Redio Isten Hail Redio Is Nu Briten; Patrick Ogirin (Karengo,

Sampela medikal studen bilong PNG i wok insait long bikipela haus sik, Royal Prince Alfred Hospital, Sydney, na kisim kain kain spesel save bilong dokta. Kirap long lephan: Gary Au'u (Galp Provins), Bernie Amof (Wes Sepik), Chris Beer (opis bilong ol), Polapoi Chalau (Manus Provins), Robin Sios (Nu Ailan, James Aidou (Morobe Provins).



Maxell Helpim OI



Maxell bateri i stap long olgeta hap.
Taim yu go long stua yu mas askim long Maxell tasol.
Maxell i no inap pinis kwik. Em bai i stap longtaim tru
...Maxell

Kisim Maxell bateri tasol



GSHM03

ASKIM NA BEKIM

ASKIM OL MEMBA

Dia Edita - Mi i gat wanpela wari, ating ol narapela man meri na pikinini i gat wankain tingting olsem mi. Em i olsem. Planti ol skul liva bilong gred 10, 8, na tu ol bilong dispela kantri ol i no inap holim wanpela wok. Na ol i stap nating long ples o go long bikpela taun na pinisim kaikai bilong wantok. Na tu ol i no inap long stap gut long wanem ol i no gat wok. Long dispela as ol i go stil long ol stua, brukim haus bilong narapela, kilim man na meri na kisim mani bilong ol. Na planti ol arapela samting tu ol i mekim long kamapim living bilong ol.

Na long dispela as mi ting dispela kantri i go daun liklik. Na long ol dispela problem mi ting edukesen i tingim ol dispela problem. Long wanem ol man i no gat inap save, ol i mekim ol dispela rabis pasin bilong daunim planti.

Mi ting em i asua bilong ol bikpela man o meri bilong edukesen, olsem edukesen minista na edukesen dairekta na ol dispela kain man i mekim na ol dispela i kamap.

Sapos dispela kain pasin i go het mi ting bai kantri i no inap go het gut. Mi gat wanpela tingting olsem. Olgeta man o meri i mas i go long skul na kisim gutpela save na kamapim living bilong ol. Mi ting dispela bai i soim dispela

ol rabis pasin ol dispela lain i mekim.

Sapos yupela ol bikpela man o meri bilong edukesen i ting mi rong. Na yupela i gat sampela aidia long dispela em i gutpela tu. Mi bai amamas sapos yupela mekim wanpela samting long dispela, bai kantri i go het gut. Na bai i no gat problem.

Em tasol. Sapos wanpela man o meri i laik helpim long dispela tok o i kritisa-saisim, orait, rait i go tasol long Wantok Niuspepa.

David Kandiu,
Wabag/Enga

GRIS LONG PASIM BEL

Dia Wantok - Mi laik helpim na sapotim gutpela tingting bilong tupela: K. GulaGula bilong Wewak na Zabbi Kero bilong Morobe long Wantok namba 233, Ogas 26, 1978. Mi bin pilim olsem yutupela na mi ting i gat wankain tingting olsem yutupela.

Nau mi laik autim sampela tingting bilong mi i go long ol gutpela man na meri i tok pait strong long gavman na ol dokta wantaim ol nesmeri husat i save tok orait long pasim bel bilong mama na salim gumi nabaut. Mi laik skelim tingting bilong mi wantaim yupela wanem man na meri i gat wankain tingting olsem mi long tok pait

long dispela kranksi tok bilong gavman long pasim bel. Hai nau tingting bilong mi:

Long ol arapela kantri, dispela kain tok i save kamap planti tumas. Em i save kamap long ol redio na long ol bikpela edvetaismen na long ol niuspepa.

Ol gavman na dokta na bisnisman i save pasim tingting na save ranim dispela kain samting. Ol bisnisman bilong salim planti, planti samting bilong ol na gavman i laik kisim profit, inkam takis.

Na ol dokta na nes ol i no laik tru long lukautim planti sik.

Tasol ol i no tingting tumas long graun bai pulap, nogat. Ol tu i no tingting tumas long manmeri bai karim bikpela hevi bilong lukautim pikinini na i laik helpim ol man na meri, nogat.

Yupela save as tingting bilong ol: Ol i laik giaman yumi long baim ol gutpela, gutpela samting na i laik mekim mipela pilim dispela samting inap rausim olgeta wari na hevi bilong yumi. Nogat tru. Ol i laik paulim yumi. I no long narapela samting ol i laik tambuim yumi long karim wanpela o tupela pikinini, em inap. Ol i laik grisim yumi tasol long westim mani bilong yumi nating long ol rabis samting ol i save bikmaus tumas long redio na niuspepa, long baim ol.

Ol i laik mekim yumi ting olsem dispela em ol i namba wan samting na inap long givim yumi amamas. No We! Wanem samting i save givim amamas moa yet long man? Amamas long ol pikinini i sindaun klostu long papa na mama o long ol gutpela samting ol bikmaus tumas long redio na long toktok bilong ol yet?

Bihain ol i mekim yumi harim tok bilong ol, orait, nau ol bai i laik mekim yumi kamap olsem pik na dok. Ol pik na dok i no save tingting tumas long arapela. Nogat. Ol i save tingting tumas long ol yet, hamas ol i mas kisim na pulimapim bel bilong ol.


Ol lain dokta na nes i tok, kam yumi pasim bel bilong yu. Yupela i mas karim tupela pikinini tasol. Na long ol piksa nabaut long klinik, ol pasim wanpela man na meri na wanpela o tupela pikinini bilong tupela sanap klostu, na ol i luk pat tumas na smatpela pikinini. Bulsit bilong ol. Ol i giaman yumi tasol. Ol i no laik tru long mekim yumi painim gutpela sindaun. Ol i no laik tru long mekim yumi painim gutpela sindaun. Ol i tok olsem tasol, em ol i giaman tasol. Ol i laik mekim yumi kamap enimel. Bai yumi i mas resis tumas long bungim planti mani na baim planti samting. Mi tok tru long yupela, ol i laik bai yumi manmeri i mas kamap selfis manmeri tru.

Mi bin ol dokta na gavman ol i no tingting tumas long yumi. Ol i tingting painim we bilong ol i ken kisim moa mani bilong ol yet. Ol i tok, taim yumi i no gat planti pikinini. Yumi i mas wok long baim ol gutpela samting long bikpela mani na bungim planti moa yet. Nogut yumi lusim planti mani tumas long ol pikinini na i no baim samting bilong ol long stua. Yupela lukim. Ol i no laik tru long helpim.

Mi wanpela Kristen man i raitim dispela na mi laik tok save long ol arapela brata na susa bilong mi long Krai. Ating yumi i gat wok long strongim tingting bilong Krai na skulim ol arapela manmeri tu long bihainim. Mi dispela kain tok bilong pasim bel, i no kamap long maus bilong Krai. Bai Krai inap larim kain tok olsem kamap long ol pipel bilong em³ Krai i no inap long askim ol mama long pasim bel na ol papa long katim bol. Krai yet i bin tok: "Mi bin kam bilong ol i ken kisim laip. laip pulap". Yumi ol man na meri bilong Krai i sanap strong long pait long dispela birua bilong Krai i kamap long maus bilong gavman na ol dokta na ol nesmeri.

Caspar Kandamain,
Pangia S.H.P.

TAMBU TORO




SAPOS OL FAMILI I LAIK WOKABAUT LONG ARERE BILONG ROT, OLGETA PIKININI I MAS STAP WANTAIM OL. OL PIKININI MAS NOKEN ISTAP LONG HAPSAIT LONG ROT. SAPOS OL I LAIK RUN I GO LONG PAPAMAMA BAI KAR INAP LONG KRUNGUTIM NA KIKIM OL IDAI.

RESIS LONG DROIM KALA PIKSA

Namba wan prais: K300

Namba tu prais: K100

Namba tri prais: K50



Long yia 1980 bai ol i wokim bikpela so tru long Papua Niugini. Nem bilong em "South Pacific Festival of Arts". Em i namba tri taim nau ol i mekim; bipo ol i mekim long Fiji na long Nu Silan. Dispela so bai ran planti de moa na i gat planti tausen kain samting yu ken lukim long en. Bai i gat planti tausen manmeri i wok long en na planti tausen moa bilong planti kantri bai kam lukim ol samting ol i bungim i stap long so.

Insait long dispela so bai ol i gat planti kain danis na singsing na musik na plaua na spot na gem na pilai na pasin bilong kukim kaikai na olkain kaving samting na bilas bilong wan wan kantri na film na muvi na kanu na haus. . . . Na ol dispela kain samting bai soim pasin bilong wan wan kantri bilong ol wansolwara bilong Pasifik. Olsem na ol i kolim em "South Pacific Festival".

Nau ol manmeri i wok long redim dispela so, i singaut na tok save olsem: ol i laikim sampela manmeri bilong ol Pasifik kantri i pentim o droim sampela piksa i gat kala. I gat wanpela resis long dispela. . . . Na yu ken droim o pentim hamas piksa yu laikim. Yu ken droim olgeta kain samting i soim pasin na kalsa bilong kantri bilong yu o ples bilong yu. Yu ken pentim o droim man meri pikinini i bilas long singsing, wanpela naispela haus, naispela ples, wanpela singsing, ol manmeri i sindaun wokim samting bilong ples olsem kanu o sospen o kaving samting, o yu ken wokim bilas nating olsem ol i gat long ples. Mekim, wokim long laik bilong yu.

Yu mas pinisim dispela wok bilong yu na salim piksa i kam bipo long de namba 31 bilong mun Mas, 1979. Bai ol saveman i glasim gut ol dispela piksa, na long mun Me 1979 bai ol i givim tripela prais.

Yu ken salim planti piksa, long laik bilong yu. Skul bilong yu o klas bilong yu tu i ken mekim olsem.

Ol piksa i mas luk olsem. . . . tasol ol i ken bikpela o smolpela maski long sais bilong ol. . . .

Piksa i mas gat kain kain kala long en; tasol yu no ken raitim sampela tok long en.

Sapos yu gat sampela gutpela tok, yu mas raitim long narapela pepa.

Salim i go long:

The Chairman
South Pacific Festival of Arts
Box 6918
BOROKO.
PAPUA NEW GUINEA.

STORI BILONG TUMBUNA

PAIT I KAMAP WE?

Bipo, bipo tru tupela brata i stap, long Wapinam Viles. Nem bilong tupela brata, Inja na Murini. Tupela brata ya wanpela em i wok long gaden, narapela em i wok long painim kapul long bus. Tupela i save kaikai wantaim na amamas tru, i no gat kros namel long tupela, na tupela i stap wanbel tru.

Nau wanpela taim tupela i laik kukim kaikai na redim ston na paiawut na lip. Nau narapela brata i kisim ol gutpela kaikai long gaden bilong em, narapela brata i kisim kapul em i bin kilim long en.

Orait nau tupela i kukim bikipela kaikai tru. Bihain tupela rausim mumu pinis, nau tupela i wok long kaikai i go yet. Tupela i kaikai inap tru na sampela i lep long en tupela i putim bilong moning tupela i laik kaikai.


Nau tutak i kamap na tupela i slip indai pinis.

Orait nau Inja i kirap long bik nait tru na pinisim olgeta kaikai tupela i putim long en, na em i slip gen. Tulait pinis Murini em i kirap na lukim kaikai tupela i putim long en. Olaman ol kaikai tupela i putim ya i no stap.

Nau Murini em i bel hat nogut tru na em i kukim haus bilong tupela na bikipela kros i kamap namel long tupela brata. Na tupela i kisim spia na akis na tupela i pait tru. Orait Inja i winim Murini na rausim em i go long Meki Viles.

Nau bikipela wara i brukim tupela. Nem bilong dispela wara em Kombu o Wara Lai, i gat tupela nem olsem. Tupela i marit na kamapim planti moa pikinini na pulapim tru olgeta ples. Tupela ya i skulim ol pikinini bilong tupela yet na ol pikinini tu i bihainim maus bilong tupela na kirapim pait i kam i go yet.


Pita Rombua,
Erave, S.H.P.



TULTUL TITAN




I no ken ting olsem bulmakau ya i gat so na ol dokta i pasim banis long em. Nogat. Em i winim pes prais long Sydney Roiol Ista So. Na em bilas bilong em. Em i bin winim.



Ol i bin lukautim bulmakau ya long wankain banis olsem ARC-Titan banis bilong mipela.

ARC-TITAN Pty. Ltd. P.O. Box 1026, LAE. Tel. 42.3988.

Gipo Sop Paura pulap long strong bilong muli Save klinim han na klos isi tru



Distributed by.

SEETO KUI (HOLDINGS) PTY. LIMITED
PAPUA NEW GUINEA

Wholesalers	Distributors	Agents
Head Office: LAE	P.O. Box 456	Phone 42 1111
Branches: GOROKA	P.O. Box 115	Phone 72 1892
MT. HAGEN	P.O. Box 232	Phone 52 1424
PORT MORESBY	P.O. Box 1405	Phone 25 4700
		Telex: SETOKUI NE 42417
		Telex: SETOKUI NE 52018
		CABLES: SEETOKUI - LAE

Hamas mani long provins bilong yu

Long yia 1979 bai gavman i lusim ol dispela mani hia long mekim kain kain spesel wok long dispela ol provins.

IS SEPIK PROVINIS

HELT	
Wewak Taun Klinik . . .	45,50C
EDUKESEN	
Passam Haiskul	187,00C
Passam Haiskul	40,00C
Oi Tisa (Passam).	90,00C
Maprik	33,00C
Yangoru	33,00C
WOK NA SAPLAI	
Wara bilong Wewak . . .	1,862,00C
GAVIEN	
Pawa	36,00C
Raba faktori	390,00C
Kakao faktori	110,00C
BAFALO	
Haus Kil - Wewak . . .	20,00C
EGRIKALSA	
Koles, Baiyik.	940,00C
LUKAUTIM PIS	
Pagiwi bris	120,00C
ROT	
Gavien	38,00C
Urimo	84,00C
Timbunke	91,00C
NBC	
Redio Is Sepik.	200,00C

WES SEPIK PROVINIS

HELT	
Malaria - Vanimo. . . .	88,00C
Vanimo haus sik.	200,00C
PLISMAN	
Plis stesin, Aitape . . .	53,00C
TRANSPOT	
Wewak-Aitape rot. . . .	100,00C
Mai-Lumi rot	550,00C
Lumi-Aitape rot.	50,00C
Bongos-Nuku	200,00C
Haus Balus, Vanimo . .	63,00C
OL HAUS PAWA	
Lumi	16,00C
Telefomin	8,00C
NBC	
Brotkas stesin	523,00C

MADANG PROVINIS

EDUKESEN	
Tech. Koles	14,500
PLIS DIPATMEN	
Wara long bareks	7,000
PRAIMERI INDASTRY	
Rais stua, Madang. . . .	25,000
Plantim tri, Gogol. . . .	89,000
BISNIS	
Bisnis developmen. . . .	30,000
TRANSPOT	
4 bris, not kos rot. . . .	200,000
Madang-Usino rot. . . .	380,000
WOK NA SAPLAI	
Wara long Madang. . . .	1,955,000
OL PAWA HAUS	
Bogia	20,000
Bundi.	37,000



Pikinini meri

Long dispela yia bilong pikinini, yumi tingting long dispela samting: Olgeta pikinini i gat rait, maski ol i man o meri. Long PNG dispela i no wanpela wari. Long planti ples na hap bilong PNG, pikinini meri i moa welkam olsem pikinini man. Long wanem, papamama i ken kisim bikpela mani taim dispela meri i redi long marit.

Tasol long planti arapela kantri, ol i no laikim pikinini meri tru. Long Saina bipo ol i save kilim indai ol pikinini meri. Na long planti arapela kantri ol i laikim pikinini man tasol. Long wanem, pikinini man i save karim nem bilong famili i go, meri mas kisim nem bilong man.

Long planti kantri tude yet skul em i samting bilong ol boi tasol; ol meri maski. Long sampela hap bilong PNG i gat dispela tingting yet. I olsem, meri em i samting nating. Man em i samting tru.

Tasol pikinini meri i gat



wankain rait olsem pikinini man. Na olsem long dispela yia bilong pikinini, yumi mas tingting long dispela samting na mekim olsem: givim wankain edukesen na helpim na trening na laik long ol pikinini meri tu.

Daubilo mipela i printim poto bilong wanpela misis em i bin raitim planti buk long ol pasin, tumbuna i save mekim, long ol meri long PNG. Em i Margaret Mead, mipela i stori long em long raitan bilong pes.

Poto antap i soim sampela ailan meri, kain Margaret Mead i bin stori long ol long ol buk bilong em.

Margaret Mead dai

Margaret Mead (poto long lephan) em i wanpela save-meri tru bilong planti kain pasin, ol tumbuna bilong pipel bilong PNG i mekim bipo. Olsem yangpela meri yet em i bin kam long PNG. Long yia 1928 em i bin go sindaun long Manus inap 6-pela mun na i raitim buk "Growing Up In New Guinea". Em i autim pasin bilong ol famili na yangpela pipel bilong ples Peri long Manus. Bihain long 25 yia em i kam bek gen long dispela ples na i laik painimaut ol dispela yangpela bebi nau i bikpela manmeri. . . . ol i mekim wanem nau? Dispela sotri em i raitim long narapela buk "New Lives For Old".

Long 1931 inap 1933 em i sindaun i stap long tripela ples long Is Sepik na i raitim buk, nem bilong em: "Sex and Temperament In Three Primitive Societies". Em i sindaun long ol maunten klostu long Dagua, na long hap bilong wara Yuat (wanpela hanwara bilong Sepik), na long Chambri. Long dispela tripela ples em i painim tripela kain pipel i gat tripela kain we bilong sindaun na wok. Long dispela taim, ol pipel i tok, Margaret Mead i pasim purpur olsem ol arapela meri na i go nabaut na wok wantaim ol.

Bihain Margaret Mead i kamap bikpela savemeri tru long Amerika, na i no pret liklik long autim tingting bilong em long olkain pasin bilong ol meri, na tu bilong ol man. Em i no save pret long paitim tok hia long PNG Yunivesiti tu wantaim ol yangpela saveman. Em i bin raitim moa olsem 20 buk long laip bilong em. Olgeta 5-pela yia samting em i save kam bek na raun lukim ol ples bilong em bipo long PNG.

Em i dai long de namba 15 bilong Novemba. Na i gat 76 krismas. Em i dai long biktaun New York, long Amerika.



PAS I KAM LONG OL PIPEL

WATPO BIKNEM SIOS

Dia Edita - Mi laik bekim gutpela pas bilong brata ya Canisius Boski bilong Lumi/W.S.P. Em i tok olsem, wan sios wan nem.

Yes, brata, mi tu mi sapotim gutpela pas bilong yu na, mi laik tokim yu olsem yu wanpela jas bilong olgeta sios bilong dispela graun ya?

Mipela i save kisim niuspepa long wan wan wik na, brata, God i no tok long kisim biknem sios na lusim liklik sios. Nogat. God inap long kisim bilipman tasol.

Na yu ting biknem misin na biknem sios inap kisim yu i go long heven ya, sapos yu yet i no bilip long God na yu bilip long biknem misin?

Brata, yu no ken skelim ol sios. Sapos yu laik skelim ol, yu mas rausim bikpela pipia i stap long ai bilong yu pastaim. Bihain yu rausim bilong ol sios.

Em tasol brata. God i blesim yu.

Saimon Aono,
Ofafina/E.H.P.

BAIBEL LONG MAKET

Dia Edita - Mi laik bekim pas bilong brata Moses Donald Duia long Wantok bilong Sarere, 2 Septemba 1978. Brata Moses, yu bin tok long brata Samuel olsem: Em i no save liklik long tok bilong God. Long bekim, mi laik bekim tok bilong yu na skruim tok bilong brata Samuel olsem. Em i tru.

Yu no ken autim nem bilong Jisas long maket ples o pablik ples. Maket ples em ol manmeri i laik wok bisnis. Pablik ples em i gat bikpela nois na toktok bai kamap. Yu bin kisim dispela Baibel ves long Matyu 10:32-33 na yu bekim tok bilong brata Samuel.

Tasol mi ken tokim yu olsem. Dispela Baibel ves long Matyu 10:32-33 i no tok long yu autim nem bilong Jisas long maket o long pablik ples. Nogat. Em i tok long yu mas

bungim ol manmeri long wanpela hap i no gat nois long dispela hap yu autim nem bilong Jisas long ol. Em bai ol i bilipim tok bilong yu. Long wanem: nogut yu autim nem bilong Jisas long maket o pablik ples, tingting bilong ol manmeri i no inap tru long holimpas tok yu autim long ol. Na bai ol i rabisim tok bilong yu liklik.

Mi yet mi lukim dispela kain pasin planti taim long ai bilong mi, olsem na mi tokim yu.

D. Dawa Silas,
Logaweng/Finschhafen.

GOD LONG MAKET

Dia Edita - Mi laik yupela givim liklik spes long mi long bekim pas bilong tupela brata em Samuel Sengi bilong Erave/S.H.P na Paul Wambeng bilong Madang.

Tupela brata i tok i no stret long lotu long maket na long ples bung nabaut. Olsem mi laik bekim i go long yutupela olsem. Ating yutupela i no save gut o ritim tok bilong God long buk baibel. Olsem na mi mas lusim sampela ves bilong baibel na yutupela mas ritim na putim i go long het bilong yutupela. Long wanem tingting bilong yutupela i no pas long God o yutupela i no bilip long em tu.

Orait baibel i tok olsem, yupela mas litimapim nem bilong mi long olgeta de. Yupela mas i go autim tok bilong mi long ples maket, ples ol i bung long en na long bus, na long san na nait na autim tok bilong mi i go long ol manmeri husat i no bilip long mi.

Mi laik bai yutupela i ritim dispela baibel ves, Korin 14:3, olsem buk baibel i tok yu mas autim tok bilong mi long ples maket. Ples bung na ples singsing na olkain ples tu, God i laik yu ken autim tok bilong em na witnes long ol arapela manmeri long tok bilong em. Tupela wantok mi laik yutupela mas givim olgeta laik na tingting i go long papa God na spirit bilong em i

ken wok insait long laip bilong yutupela.

Orait, sapos yutupela i laik save moa, sutim pas i go long Wantok Niuspepa long Boroko na mi ken lukim. Em tasol. Tenkyu.

Jos Aegobi,
Okapa/E.H.P.

AIDIA BILONG WANPELA MAN

Dia Edita - Mi laik krosim ol tru, ol Simbu meri. Papa bilong boi em i laik baim gutpela meri, planti gutpela samting em i hat long painim pik, mani, gras pisin, muruk, na ol arapela samting.

Nau yu gutpela meri tu-mas bikpela samting hia olgeta i go indai long yu tasol. Tumora yu i stap we? Yu go pinis long K2 bus.

Nau yupela ol dokta harim. Sapos meri i gat sik siples o gonoria, nau em i kam long haus sik. Yu askim em yu gat man? Olgeta pe i pinis? Em i stret, givim sut. Nogat. Maski larim em i go tok bilong God i kam long taim tru. Yu brukim mandato namba 6. God i belhat na i givim strafe, yumi kolim (V.D.).

Plis meri yu kristen, harim tok liklik, yu no ston na bai yu stap oltaim. God i singautim yu bihain, yu go kot long God papa. Angelo bai ol i holim han bilong yu na tomoim yu i go long bikpela paia. Sampela wantok i kros, orait, rait tasol i go long Wantok Niuspepa. Bai mi ken lukim.

Piu Tobia Mai,
Kundiawa.

TOK SAVE LONG PASINDIA

Dia Edita - Inap yu givim liklik hap spes long mi o nogat. Mi laik putim liklik wari bilong mi long Wantok Niuspepa. Wari bilong mi i olsem long pasindia man.

Mi bin lukautim wanpela pasindia man na mi les tru. Taim mi kisim mani long potnait, mi save givim em

bas fi na mi baim kaikai bilong mitupela na mi baim bas i go long wok. Long apinun mi baim bas i kam bek long haus. Olsem na mi sot long mani bilong smok na sot long bas fi.

Sapos yu husat man yu i stap pasindia yu mas lukim dispela pas. Taim yu i stap long ples, mipela ol wokman bilong taun o wantok bilong yu i no singautim yu i kam long mipela. Sapos yu laik wok na yu kam, orait, yu mas painim wok hariap na yu wok.

Sampela man ol i wok long taun ol i no kisim bikpela mani, ol i kisim olsem K50 na K60 olsem tasol. Dispela mani i go long pawa na i go long wara, i go long haus. Hap liklik i stap, meri bilong ol i kisim baim kaikai na baim sampela samting bilong pikinini. Dispela mani i pinis na hap mani bilong givim ol pasindia man na mani i pinis.

Dispela wokman wantaim meri bilong em tupela bai kisim mani we? Tupela i gat bisnis long taun o nogat? Mi sori nogut tru long ol marit na mi raitim dispela pas i kam long Wantok Niuspepa. Sapos yu man yu lukim i no stret long yu, orait yu rait i go long Wantok Niuspepa na mi lukim. Em tasol mi tok save.

John Kambu Marang,
Port Moresby.

LOKAL PRIS

Dia Edita - Mi laik bekim pas bilong Paul Kanda Tondopan, Typical bilong Enga. Yes, Paul, gutpela tru yu bekim pas bilong mi, mi amamas. Yu bin askim mi planti kwesten.

Mi laik bekim sampela tasol.

Namba wan, Paul, yu gat hamas lokal pater o pris bilong yu i kamap long Enga Provins? Na yu tingim bek long sindaun bilong yu bihein o yu tok tasol? Pren Paul, mi ken tokim yu stret, laki tru, yu stap wantaim gutpela misinari wantaim ol ovasis kantri nau. Sapos ol gavman bilong PNG ol i tok, arapela kantri i go long ples, Yu gat hamas pris na sister na bruder i kamap long Enga Provins?

Pren, yusim het bilong yu. Paul, mi ken tokim yu, wanem kain tingting i kamap long het, yu rait tasol. Yu no ting long samting i kamap bihain.

Paul yu go insait long hap bilong baibel, ating yu wanpela hap man i bin autim tok bilong God. Paul, mi laik askim yu long wanpela kwesten bilong yu. Yu laik beten long ol lain misineri i stap o yu laik pre long ol nupela lain i laik kamap joinim Krai? Paul, traim na beten planti bai ol lokal pris long ples yet i kamap. No ken wet long ol lain pris bilong arapela kantri.

Paul, God i mekim man na meri, laik i stap long olgeta hap bilong bodi. Sapos yu wanpela man bilong autim tok bilong Krai. Yu no ken soim pasin nogut long lain sipsip bilong yu. Nau yu kisim baibel bilong yu na opim long dispela sapta. Matyu 18:6-9. Yu bin lukim sapta bilong en. I gat sampela bilong Mak na Luk tu i stap o nogat.

Em tasol liklik bekim bilong Paul. Sapos yu ting wanem, rait tasol i go long Wantok Niuspepa.

Peter K.K. Kaupa,
Mingendi Simbu.

BAIM WANTOK

Sapos yu laik kisim Wantok niuspepa olgeta wik inap long wan yia stret, yu salim nem na adres bilong yu wantaim K8.00 i kam long:

WANTOK BOX 1982 BOROKO

Long go long Australia em i K14.00.

Long Yurop na Amerika: K18.20 (long sip)

K 24.00 (long balus)

OL TESTAMEN STORI

Used by permission of the David C. Cook Foundation. Copyright 1973, David C. Cook Publishing Co. All rights reserved.

KING SOL I HARIM TOK LONG OL AMON I BANISIM WANPELA TAUN BILONG ISREL NA EM I LAIK I GO PAIT. WANPELA WANPELA MAN TASOL I LAIK HELPIM EM, OLSEM NA EM I KIRAP NOGUT NA I KROS MOA. OL ISREL I PRET OLSEM NA OL I NO LAIK PAIT. ORAIT SOL I NO SINDAUN NATING.

KING I TOK PINIS. SAPOS WANPELA MAN I NO LAIK HELPIM KING SOL, BAI MIPELA I MAS KILIM OL BULMAKAU BILONG EN.

NOGUT YU MEKIM OLSEM, BAI MI KEN JOIN LONG AMI, NAU TASOL.


King Sol I Tokim Ol Isrel Long Pait

1 Samyuel

11 - 13:9



PLANTI MAN I KAM JOINIM AMI, NA OL I GO KAMAP LONG TAUN NA TAIM TULAIT I BRUK OL KIRAPIM PAIT LONG OL AMON.



WANTOK SPOT PES



**husat
i
stap
?**

